

**BOSNA I HERCEGOVINA**  
*Konkurencijsko vijeće*



**БОСНА И ХЕРЦЕГОВИНА**  
*Конкуренцијски савјет*

## **RJEŠENJE**

**po Prijavi namjere koncentracije privrednog subjekta "Mercur"  
d.d. Sarajevo i privrednog subjekta DC "KONJIC" d.d. Konjic**

**Sarajevo,  
Septembar 2009. godine**



Broj: 01-03-26-020-7-II/09  
Sarajevo 30.09.2009. godine

Na osnovu člana 25. stav (1) tačka e), člana 42. tačka d), člana 43. stav (2), a u vezi sa članovima 12., 14., 16., i 18. Zakona o konkurenciji ("Službeni glasnik BiH", br. 48/05 i 76/07), rješavajući po Prijavi namjere koncentracije privrednog subjekta Dioničko društvo za unutrašnji i vanjskotrgovinski promet "Mercur" d.d. Sarajevo, ul. Semizovac bb, Semizovac, Vogošća i privrednog subjekta Diničko društvo Distributivni centar "KONJIC" d.d. Konjic, ul. Sarajevska br. 43, Konjic, zaprimljene dana 05.06.2009. godine, pod brojem: 01-03-26-020-2-II/09, Konkurencijsko vijeće na 94. (devedesetčetvrtoj) sjednici održanoj dana 30.09.2009. godine, je donijelo

### **R J E Š E N J E**

1. Ocjenjuje se dopuštenom koncentracija koja će nastati na tržištu trgovine na malo u nespecializiranim prodavnicama pretežno prehrambenih proizvoda, pića i duhanskih proizvoda u Federaciji Bosne i Hercegovine, pripajanjem privrednog subjekta Dioničko društvo Distributivni centar "KONJIC" d.d. Konjic privrednom subjektu Dioničko društvo za unutrašnji i vanjskotrgovinski promet "Mercur" d.d. Sarajevo.
2. Ovo Rješenje je konačno i upisuje se u registar koncentracija.
3. Ovo Rješenje biće objavljeno u "Službenom glasniku BiH", službenim glasilima entiteta i Brčko Distrikta Bosne i Hercegovine.

### **OBRAZLOŽENJE**

Konkurencijsko vijeće je zaprimilo, dana 05.06.2009. godine pod brojem 01-03-26-020-II/09, Prijavu namjere koncentracije (u daljem tekstu: Prijava) privrednog subjekta Dioničko društvo za unutrašnji i vanjskotrgovinski promet "Mercur" d.d. Sarajevo, Semizovac bb, Semizovac, Vogošća, koji je ujedno i Podnosilac prijave (u daljem tekstu: "Mercur" ili Podnosilac prijave) i privrednog subjekta Diničko društvo Distributivni centar "KONJIC" d.d. Konjic, Sarajevska 43, Konjic (u daljem tekstu: DC "KONJIC"). Predmetna Prijava se odnosi na namjeru pripajanja privrednog subjekta DC "KONJIC" privrednom subjektu "Mercur".

Uvidom u dostavljenu dokumentaciju, utvrđeno je da Prijava nije potpuna u smislu člana 30. Zakona o konkurenciji (u daljem tekstu: Zakon). U skladu sa tim Konkurencijsko vijeće je od Podnosioca prijave zatražilo dopunu Prijave, koju je isti dostavio, u smislu člana 30. Zakona, dana 22.06.2009. godine pod brojem: 01-03-26-020-2-II/09.

Nakon kompletiranja Prijave Konkurencijsko vijeće je izdalo Potvrdu o kompletnoj i urednoj prijavi, u smislu člana 30. stav (3) Zakona, dana 25.08.2009. godine pod brojem: 01-03-26-020-5-II/09.

Podnosilac prijave je naveo da nije podnio zahtjev za ocjenu koncentracije ovlaštenim tijelima za konkurenciju izvan teritorije Bosne i Hercegovine.

U postupku ocjene Prijave Konkurencijsko vijeće je utvrdilo sljedeće činjenice:

Prijava je podnesena u propisanom roku od osam dana, u skladu sa članom 16. stav (1) Zakona.

## 1. Učesnici koncentracije

Učesnici koncentracije su privredni subjekt "Merkur" d.d. Sarajevo, Semizovac bb, Semizovac, Vogošća i privredni subjekt DC "KONJIC" d.d. Konjic, Sarajevska br. 43, Konjic.

### 1.1. Privredni subjekt "Merkur" d.d. Sarajevo

Privredni subjekt Dioničko društvo za unutrašnji i vanjskotrgovinski promet "Merkur" d.d. Sarajevo, Semizovac bb, Semizovac, Vogošća, prema izvodu iz sudskog registra broj: 065-0-Reg-Z-09-002208 od dana 20.05.2009. godine, registrovan je kod Općinskog suda u Sarajevu sa matičnim brojem upisa: 1-1573. Prva registracija privrednog subjekta "Merkur", kao dioničkog društva izvršena je kod Osnovnog suda udruženog radu u Mostaru dana 02.07.1991. godine, pod brojem U/I-896/91, sa sjedištem u Mostaru, Alekse Šantića 4.

Vlasnička struktura privrednog subjekta "Merkur" je:

Tabela 1.

R.b.	Vlasnici dionica	Vlasnički udio (%)
1.	"MIMS" d.o.o. Sarajevo	78,0415
2.	IF "NAPRIJED" d.d. Sarajevo	10,0420
3.	Selimović Mujo	1,7434
4.	Trgo Adil	1,5419
5.	Ostali (pojedinačno ispod 1%)	8,6312
	<b>Ukupno</b>	<b>100,0</b>

Izvor: Registar vrijednosnih papira u Federaciji BiH i podaci iz Prijave

Osnovna djelatnost privrednog subjekta "Merkur" je trgovina na malo u nespecijaliziranim prodavnicama pretežno prehrambenih proizvoda, pića i duhanskih proizvoda, a pored toga obavlja i ugostiteljsku djelatnost (restorani, barovi, bifei, kafane, kantine).

U sastavu privrednog subjekta "Merkur", na dan 31.12.2008. godine, nalazi se maloprodajna mreža sa sedam (7) hipermarketa i tridesettri (33) samoposluge-prodavnice i ugostiteljska mreža sa trinaest (13) ugostiteljskih objekata, koji su locirani u regijama Sarajevo, Bihać, Zenica i Mostar.

Privredni subjekt "MIMS" d.o.o. Semizovac bb, Semizovac, Vogošća ima 78,0415% vlasničkog udjela u privrednom subjektu "Merkur".

Vlasnici privrednog subjekta "MIMS" d.o.o. Sarajevo sa po 50% vlasničkog udjela su fizičko lice Selimović Mujo, JMBG (..)\*<sup>1</sup>, (..)\*, (..)\* i fizičko lice Borišić Mujesira, JMBG (..)\*, (..)\*, (..)\*.

Privredni subjekt "Merkur" nema zavisnih privrednih subjekata u kojima ima 10,0% ili više udjela u osnovnom kapitalu ili 10,0% ili više prava glasa.

---

(..)\* Podaci se smatraju poslovnom tajnom u smislu člana 38. Zakona o konkurenciji

Članovi uprave ili nadzornog odbora privrednog subjekta "Merkur", koji su istovremeno članovi uprave ili nadzornog odbora drugog privrednog subjekta na relevantnom tržištu su:

- direktor privrednog subjekta "Merkur" Peljto Džemaludin, koji je član nadzornog odbora privrednog subjekta "MLIN I PEKARE" d.d. Ljubače, čija je osnovna djelatnost proizvodnja brašna, hljeba i peciva;
- predsjednik nadzornog odbora privrednog subjekta "Merkur" Selimović Mujo, koji je predsjednik nadzornog odbora privrednog subjekta "Unioninvestplastika" d.d. Sarajevo, čija je osnovna djelatnost proizvodnja ploča, listova, cijevi i profila od plastičnih masa i član nadzornog odbora privrednog subjekta "Sarajevska pivara" d.d. Sarajevo, čija je osnovna djelatnost proizvodnja i promet piva i bezalkoholnih pića;
- član nadzornog odbora privrednog subjekta "Merkur" Delalić Mirzeta, koja je član nadzornog odbora privrednog subjekta "PAPIR SERVIS" d.d. Sarajevo, čija je osnovna djelatnost reciklaža nemetalnih ostataka i otpadaka.

## 1.2. Privredni subjekt DC "KONJIC" d.d. Konjic

Privredni subjekt Dioničko društvo Distributivni centar "KONJIC" Konjic, sa sjedištem ul. Sarajevska br. 43, Konjic, prema izvodu iz sudskog registra od 23.04.2009. godine, registrovan je kod Općinskog suda u Mostaru sa matičnim brojem upisa 1-864. Prva registracija privrednog subjekta DC "KONJIC", kao dioničkog društva izvršena je kod Osnovnog suda udruženog radu u Mostaru dana 17.10.1991. godine.

Vlasnička struktura privrednog subjekta DC "KONJIC" je:

Tabela 2.

R.b.	Vlasnik dionica	Vlasnički udio (%)
1.	"MIMS" d.o.o. Sarajevo	48,8443
2.	IF "NAPRIJED" d.d. Sarajevo	24,9995
3.	"Dijamant" d.d. Sarajevo	16,5599
4.	<b>Selimović Mujo</b>	<b>3,7055</b>
5.	Blažević Ilko	1,2409
6.	Ostali (pojedinačno ispod 1%)	4,6499
	<b>Ukupno</b>	<b>100,0</b>

Izvor: Registar vrijednosnih papira u Federaciji BiH i podaci iz Prijave

Osnovna djelatnost privrednog subjekta DC "KONJIC" je trgovina na malo u nespecijaliziranim prodavnicama pretežno prehrambenih proizvoda, pića i duhanskih proizvoda, a trenutno se bavi samo djelatnošću iznajmljivanja vlastitih nekretnina.

U svom sastavu privredni subjekt DC "KONJIC" ima jedan poslovni objekat površine 4.895,92 m<sup>2</sup>, u Konjicu.

Privredni subjekt "MIMS" d.o.o. Sarajevo sa 48,8443% ima najveći vlasnički udio u privrednom subjektu DC "KONJIC", dok fizičko lice Selimović Mujo, koji je suvlasnik privrednog subjekta "MIMS" d.o.o. Sarajevo ima 3,7055% vlasničkog udjela.

Privredni subjekt DC "KONJIC" nema zavisnih privrednih subjekata u kojima ima 10,0% ili više udjela u osnovnom kapitalu ili 10,0% ili više prava glasa.

Članovi uprave ili nadzornog odbora privrednog subjekta DC "KONJIC", koji su istovremeno članovi uprave ili nadzornog odbora drugog privrednog subjekta su:

- predsjednik nadzornog odbora privrednog subjekta DC "KONJIC" Borišić Mirsad, koji je član nadzornog odbora privrednog subjekta "Sarajevska pivara" d.d. Sarajevo i član nadzornog odbora DUF Naprijed Invest d.o.o. Sarajevo, čija je osnovna djelatnost upravljanje fondovima;
- član nadzornog odbora privrednog subjekta DC "KONJIC" Borišić Mujesira, koja je član nadzornog odbora privrednog subjekta "Unioninvestplastika" d.d. Sarajevo i član nadzornog odbora privrednog subjekta "Sarajevska pivara" d.d. Sarajevo.

## 2. Obaveza prijave namjere koncentracije

Obaveza prijave namjere koncentracije privrednih subjekata, u smislu odredbe člana 14. stav (1) tačka b) Zakona, postoji ako ukupni godišnji prihod svakog od najmanje dva privredna subjekta učesnika koncentracije ostvaren prodajom roba i/ili usluga na tržištu Bosne i Hercegovine iznosi najmanje 5.000.000,00 KM po završnom računu u godini koja je pethodila koncentraciji.

Ukupni godišnji prihodi privrednih subjekata učesnika predmetne koncentracije, na dan 31. decembra 2008. godine, iznose:

Tabela 3.

Privredni subjekt	"Merkur"	DC "KONJIC"
Bosna i Hercegovina	(..)* KM	(..)* KM
Svijet	-	-

Izvor: podaci iz Prijave

Konkurencijsko vijeće je utvrdilo da su privredni subjekti učesnici koncentracije u 2008. godini ostvarili ukupan prihod koji podliježe obavezi prijave namjere koncentracije, u skladu sa članom 14. stav (1) tačka b) Zakona.

Godišnji prihod učesnika koncentracije predstavlja ukupan prihod (bez poreza na dodanu vrijednost i drugih poreza koji se direktno odnose na učesnike koncentracije na tržištu Bosne i Hercegovine), u smislu člana 8. tačka h) Odluke o načinu podnošenja prijave i kriterijima za ocjenu koncentracija privrednih subjekata ("Službeni glasnik BiH", br. 95/06).

## 3. Pravni okvir ocjene predmetne koncentracije

Konkurencijsko vijeće je u provođenju postupka ocjene dopuštenosti predmetne koncentracije primijenilo odredbe Zakona, Odluke o utvrđivanju relevantnog tržišta ("Službeni glasnik BiH", br. 18/06), te Odluke o načinu podnošenja prijave i kriterijima za ocjenu koncentracija privrednih subjekata.

## 4. Pravni osnov i oblik koncentracije

Pravni osnov koncentracije je Odluka nadzornog odbora privrednog subjekta "Merkur", broj: N.O.-19/09 od 29.05.2009. godine i Odluka nadzornog odbora privrednog subjekta DC "KONJIC", broj: N.O.-05/31-70/09 od 29.05.2009. godine, koje su dana 01.06.2009. godine objavljene u dnevnom listu "Oslobođenje", o namjeravanoj reorganizaciji (statusnoj promjeni) pripajanjem privrednog subjekta DC "KONJIC" privrednom subjektu "Merkur".

Pravni oblik koncentracije u skladu sa članom 12. stav (1) tačka a) Zakona, predstavlja pripajanje nezavisnih privrednih subjekata.

## 5. Relevantno tržište

Relevantno tržište, u smislu člana 3. Zakona, te članova 4. i 5. Odluke o utvrđivanju relevantnog tržišta, čini tržište određenih proizvoda i/ili usluga koji su predmet obavljanja djelatnosti na određenom geografskom području.

Prema odredbi člana 4. Odluke o utvrđivanju relevantnog tržišta, relevantno tržište proizvoda obuhvata sve proizvode i/ili usluge koje potrošači smatraju međusobno zamjenjivim s obzirom na njihove bitne karakteristike, kvalitet, namjenu, cijenu ili način upotrebe.

Prema članu 5. Odluke o utvrđivanju relevantnog tržišta, relevantno tržište u geografskom smislu obuhvata cijelu ili dio teritorije Bosne i Hercegovine, na kojoj su tržišni konkurenti aktivni u prodaji i/ili kupovini relevantnog proizvoda pod jednakim ili dovoljno ujednačenim uslovima koji to tržište bitno razlikuju od uslova tržišne konkurencije na susjednim geografskim tržištima.

Relevantno tržište prema predmetu poslovanja za predmetnu koncentraciju je tržište trgovine na malo u nespecijaliziranim prodavnicama pretežno prehrambenih proizvoda, pića i duhanskih proizvoda. Relevantno tržište prema teritoriji na kojoj posluju učesnici koncentracije je Federacija Bosne i Hercegovine.

Na osnovu navedenog kao relevantno tržište predmetne koncentracije utvrđeno je tržište trgovine na malo u nespecijaliziranim prodavnicama pretežno prehrambenih proizvoda, pića i duhanskih proizvoda u Federaciji Bosne i Hercegovine.

## 6. Analiza relevantnog tržišta

Analiza relevantnog tržišta i vezano za to glavnih konkurenata učesnika koncentracije, obuhvatila je privredne subjekte koji obavljaju istu ili sličnu djelatnost koja je uzeta kao relevantan proizvod na relevantnom tržištu Federacije BiH, a odnosila se prevashodno na veće trgovinske lance.

Tržišni udjeli učesnika koncentracije i njihovih konkurenata na relevantnom tržištu u 2008. godini, su:

Tabela 4.

R.b.	Privredni subjekt	Tržišni udio (%)
1.	Bingo - Tuzla	11,0
2.	Konzum - Sarajevo	7,0
3.	Mercator BH - Sarajevo	6,6
4.	Interex - Sarajevo	4,9
5.	Drvopromet - Sarajevo	4,0
6.	Robot - Sarajevo	2,4
7.	Ilma - Bihać	1,8
<b>8.</b>	<b>Merkur - Sarajevo</b>	<b>1,5</b>
9.	Tropic - Banja Luka	0,3
<b>10.</b>	<b>DC Konjic - Konjic</b>	<b>0,16</b>
11	Ostali	60,34
	Ukupno	100,0
	<b>Ukupno (8+10)</b>	<b>1,66</b>

Izvor: GfK BH-Centar za istraživanje tržišta, Skenderija 44, Sarajevo i podaci iz Prijave

Iz navedenih podataka (Tabela 4.) najveći tržišni udio na relevantnom tržištu od 11,0% ima privredni subjekt "Bingo" d.o.o. Tuzla, privredni subjekt "Konzum" d.o.o. Sarajevo sa 7,0%,

privredni subjekt "Mercator" BH d.o.o. Sarajevo sa 6,6% i privredni subjekt "Interex" d.o.o. Sarajevo sa 4,9%, dok zajednički tržišni udio učesnika koncentracije, privrednog subjekata "Merkur" i privrednog subjekta DC "KONJIC" iznosi 1,66%.

## **7. Ocjena predmetne koncentracije**

Konkurencijsko vijeće je prilikom provođenja postupka za donošenje ovog Rješenja analiziralo i procijenilo sve relevantne podatke i činjenice, u smislu člana 17. Zakona i ocijenilo da provođenje predmetne koncentracije neće dovesti do promjene postojeće tržišne konkurencije na relevantnom tržištu.

Analiza podataka pokazuje da je relevantno tržište slabo koncentrisano jer postoji veliki broj privrednih subjekata s relativno malim tržišnim udjelima što onemogućava stvaranje dominantnog položaja.

Konkurencijsko vijeće je utvrdilo da se predmetnom koncentracijom ne stvara i ne jača dominantan položaj na relevantnom tržištu i da koncentracija neće dovesti do značajnijeg povećanja tržišnog učešća učesnika koncentracije na relevantnom tržištu, te je ocijenilo predmetnu koncentraciju dopuštenom, u smislu člana 18. stav (2) pod a) Zakona, kao što je navedeno u dispozitivu ovog Rješenja.

## **8. Administrativna taksa**

Podnosilac Prijave na ovo Rješenje, u skladu s članom 2. tarifni broj 107. stav (1) tačka d) pod 1) Odluke o visini administrativnih taksi u vezi s procesnim radnjama pred Konkurencijskim vijećem ("Službeni glasnik BiH", broj 30/06) dužan je platiti administrativnu taksu u ukupnom iznosu od 2.500,00 KM u korist Budžeta institucija Bosne i Hercegovine.

## **9. Pouka o pravnom lijeku**

Protiv ovog Rješenja nije dozvoljena žalba.

Nezadovoljna stranka može pokrenuti upravni spor pred Sudom Bosne i Hercegovine u roku od 30 dana od dana prijema ovog Rješenja, odnosno od dana njegovog objavljivanja.

**Predsjednik**

**dr. Stjepo Pranjić**

### **Dostaviti:**

- Podnosiocu prijave – "Merkur" d.d. Sarajevo, ul. Semizovac bb, 71321 Semizovac
- u spis
- arhiv Konkurencijskog vijeća